

Nix wie a Ledrpeitsch

De Großmatze Jergl vun dere langi Gass, in unserem Dorf war a recht reiche Bauer, er hat viel Feld un a große Baurewertschaft ghat. Er hat aach a großes Mädgl ghat bei dem die Zeit schon lang reif war, dass es schon so langsam an s Heirate denke hätt misse.. Natirlich hat de Großmatze Jergl sich große Sorche um des Mädgl gmacht, er wollt um gar keen fall a Schwiersohn han, der net in sei Wertschaft rinpasst, oder sich vielleicht wenich um ne kimmre tät. Es Gretl, so hat dem Großmatze Jergl sei Mädgl geheest,- hat awer schon a Porscht ghat, un hätt ach gere den gheirat, der Bu hat awer viel im Kopp un wenich im Sack ghat, un des war for,s Gretl es große Problem. Noh langem Hin un Herpaljasche hat de Großmatze Jergl sich doch ingwilicht, dass es Gretl sei Porscht heirate därf. Er war uf dr Meinung, dass der Bu fleisich un anständig is. Die Hochzeit is mit viel Gäscht vun em ganze Dorf, zwei Tääch lang gfeiert gin. A paar Johr noh dere Hochzeit hat de Großmatze Jergl sei ganzes Vemeetje seini Kiner iwerschrieb, sei Tochter un aach sei Schwiersohn han ihrem Vatr hoch un heilich versproch, dass se ne anständig, wie sichs gheert, bis an sei Lewesend bediene were. Dem Großmatze Jergl sei Weib war schon vor Johre verstorbt, un desweje hat er sich den Plaan aus studiert, in dere Hoffnung das die Kiner ihre verspreches ach hale were. Es hat gar net so lang gedauert, dernoh hat sei Tochter un Schwiersohn schon nimi des inghal was se im domols versproch han, un sie han alli Schikane an ihm ausproviert, sie han ne täglich gekränk in dr Hoffnung das r bal sterbt..

De Großmatze Jergl war awer a Mann wu net uf de Kopp gfall war. Er is zum Vetr Joschko gang, der unner seim Garte gwohnt hat un ach a guti Wertschaft ghat hat, un hat sich vun dem viel Geld uf ghol. Des Geld hat er mol Owets vor seini Kinner aus seim Holzene Kupfer, den wu er aach beim Militär ghat hat, raus ghol un nohgezählt. Sei Schwiersohn un aach sei Tochter ware so erstaunt, dass se glei gar net es Maul zu mache han kenne. Sie han gment, dass ihre Vatr ihne alles domols gin hat. De Großmatze Jergl hat des Geld wieder in den Kupfer getun un hat gsaat. Ich han eng net alles gin, awer noh meim Tod griet ihr des ganzi was do im Kupfer is, niemand anere sol es han wie ihr, awer nor so wann ihr mich aach als Vatr bis an mei Lewesend anständig bedient. Hat no den Holz Kupfer zu gsperrt un irgendwu im Haus abgestellt.

Des Geld hat er noo am nächscte Taa seim Nochber unnerem Garte zuruck getraa.

Sei Tochter un aach sei Schwiersohn han vun dere Zeit ane ihrem Vater alles guti getun, sie han,m jede Wunsch was er ghat hat vun seini Aue abgleest un ach gmacht. De Großmatze Jergl war zufriede un hat ach a schenes Lewe als Vorhalter ghat, er hat sogar Sonntags mit seini Kulegers im Wertshaus ghuckt un hat Karte gspielt, er hat s awer niemols zu arich getrieb. Die Johre sin vergang un die Zeit is kumm wu der Sensemann am Großmatze Jergl seim Bett gstan hat, un gsaat hat „Die Uhr is abgeloff, die Zeit wu du do unne warscht is rum, Du muscht mitkumme „,

Glei no dem Großmatze Jergl seiner Leicht, han sei Kiner es ganzi Haus noh dem Kupfer absucht. Endlich mol hann se ne gfun Un weil gar khe Schlissl zu fine war is der Kupfer ufgebroch gin. Im Kupfer war nix Wie a Ledr Peitsch un a Zettl. Uf dem Zettl war mit gotischi Buchstawe gschrieb, Mit dere Peitsch muss mer alli verschlaan die so dumm ware un ihre Kiner alles was se ghat han, vor ihrem Tod iwerschrieb han!.

Hans Niedermayer Dolatz

